

Jom Masuk IPT Buka Tirai Karnival di Pahang



Kuantan, 14 Februari- Lebih 30 ribu pengunjung dari Pantai Timur terutamanya di negeri Pahang hadir beramai-ramai ke Karnival Pendidikan Tinggi Negara 2015 yang dianjurkan buat kali ke-11 apabila negeri Pahang dipilih sebagai lokasi pembuka tirai karnival anjuran Kementerian Pendidikan Malaysia (KPM) dengan kerjasama Universiti Malaysia Pahang (UMP) yang berlangsung dua hari di SASICC, The Zenith Hotel Kuantan.

Majlis dirasmikan Menteri Pendidikan 11, Dato' Seri Idris Jusoh dengan dihadiri Pengerusi Jawatankuasa Kesihatan, Sumber Manusia dan Tugas-tugas Khas mewakili Menteri Besar dan Naib Canselor UMP, Profesor Dato' Dr. Daing Nasir Ibrahim. Hadir sama Ketua Pengarah Pendidikan Tinggi, Dato' Profesor Dr. Asma Ismail, Ketua Pengarah Jabatan Pendidikan Politeknik, Datuk Hj. Mohlis Jaafar, Ketua Pengarah Jabatan Pendidikan Kolej Komuniti, Dato' Amir Md. Noor dan Pengarah Bahagian Pengurusan Kemasukan Pelajar, Mazula Sabudin.

Dalam ucapannya perasmian, Dato' Seri Idris menasihatkan pelajar memilih jurusan pengajian di dalam negara apabila terdapat 11 fakulti yang telah mendapat tempat dan diiktiraf antara 100 terbaik di dunia. Begitu juga dengan penawaran pengajian dwi-ijazah yang ditawarkan di UMP yang mendapat kerjasama dengan universiti Jerman, Hochschule Karlsruhe Technic und Wirtschaft (HsKA), Karlsruhe, Jerman melalui penawaran program di peringkat pengajian sarjana muda dan siswazah. Selain itu pelajar juga perlu mengambil peluang untuk mengambil kursus-kursus di politeknik dan kolej komuniti di seluruh negara menerusi penawaran program yang tidak kurang hebatnya dan diiktiraf di peringkat antarabangsa.



Sementara itu, menurut Profesor Dato' Dr. Daing Nasir, objektif utama program tersebut adalah mendidik serta memotivasikan para pemohon serta menyebarkan maklumat tepat serta terkini mengenai peluang pendidikan di negara ini. "UMP amat berbangga kerana dapat bersama dengan KPM dalam menerajui penganjuran Karnival Pengajian Tinggi Negara (KPTN) 2015 "Jom Masuk IPT" Zon 1 Pahang. "Acara ini merupakan medan di mana UMP, sebagai sebuah Institusi Pengajian Tinggi Awam (IPTA) dapat berganding bahu bersama KPM dan rakan-rakan IPT lain untuk menunaikan tanggungjawab sosial untuk menyebarkan maklumat dan peluang pengajian tinggi di Malaysia," katanya.

Sebagai pembuka tirai KPTN bagi tahun 2015, Dato' Dr. Daing mengharapkan kejayaan penganjuran edisi di Zon 1 ini kelak akan turut memberi impak positif dari segi sambutan dan maklum balas umum untuk lapan zon lain hingga bulan April yang akan datang. Beliau mengharapkan program ini dapat dimanfaatkan sepenuhnya oleh kumpulan sasaran yang ditetapkan untuk mendapatkan sebanyak maklumat yang boleh agar mereka berupaya membuat pilihan program yang tepat, bijak serta bersesuaian dengan kelayakan, minat dan cita-cita mereka.

Katanya, selain pameran dan pendedahan maklumat, karnival itu juga akan menjalankan beberapa aktiviti seperti kuiz, khidmat nasihat, bimbingan, kaunseling pendidikan dan permohonan aplikasi atas talian. Majlis perasmian berlangsung dengan suasana meriah dengan kehadiran pelajar sekolah sekitar Kuantan. Karnival bakal diadakan di lapan zon lain termasuklah di Universiti Sains Malaysia (USM), Melaka International Trade Centre, Universiti Islam Antarabangsa Malaysia, Universiti Tun Hussein Onn dan Pusat Transformasi Luar Bandar Kota Bharu dan Padang Merdeka Kota Kinabalu Sabah.

Selain melawat 120 buah booth pameran daripada institusi pengajian tinggi dan jabatan, agensi berkaitan, pengunjung juga berpeluang membuat semakan syarat khas kelayakan program ke IPTA, Politeknik dan ILKA melalui e-Panduan Permohonan Kemasukan ke IPTA, e-Panduan Permohonan Kemasukan ke Politeknik Konvensional/METRO, Kolej Komuniti dan ILKA.

UMP juga akan menganjurkan program Hari Terbuka UMP 2015 yang merupakan kesinambungan program dalam mempromosikan sistem pembelajaran dan pengajaran di UMP untuk memberi peluang kepada lepasan Sijil Pelajaran Malaysia (SPM) serta pelajar Matrikulasi dan Politeknik untuk mengetahui peluang-peluang pengajian khususnya di UMP selaras dengan pengumuman keputusan SPM yang dijangka diumumkan pada bulan Mac nanti.



Disediakan Unit Perhubungan Awam, Bahagian Komunikasi Korporat PNC

Posted By : SITI SARAH BINTI MOHAMAD RAJIMI Date Posted : 16-02-2015, 16:14:03